



## **ORDENANZA MUNICIPAL REGULADORA DA XESTIÓN DE BIOMASA, DISTANCIAS DE PLANTACIÓNS E PREVENCIÓN DE INCENDIOS FORESTAIS.**

O plan de desenvolvemento rural de Galicia (PDR), recoñece os incendios forestais como un dos máis importantes problemas ambientais de Galicia, constituíndo unha grave causa de perdas de riqueza nas economías rurais, un risco severo para as persoas e os ecosistemas e unha fonte inagotable de gasto público. Por todo o anterior, fai falta desenvolver políticas activas de prevención e loita contra os incendios forestais que permitan protexer de maneira efectiva dos recursos naturais e humanos do territorio dos riscos asociados ao lume.

Neste sentido, a aprobación da Lei 3/2007, do 9 de abril, de Prevención e Defensa contra os Incendios Forestais de Galicia, implicou a implantación de novas estratexias de prevención de incendios forestais que perseguían cumprir con estes obxectivos. Sin embargo, as novas medidas de prevención de incendios establecidas pola lei, supuxeron adquisición de novas responsabilidades por parte de todos os axentes sociais relacionados directa ou indirectamente co medio rural e forestal.

En relación ás responsabilidades dos concellos, o artigo 16 da Lei 3/2007, establece un conxunto de normas e consideracións técnicas, sin embargo, algúns aspectos esenciais da prevención de incendios forestais a escala municipal non foron explicitamente determinados na Lei 3/2007, polo que deben de ser concretados por medio da aprobación dunha ordenanza municipal específica.

Conforme á potestade atribuída polos artigos 4 da Lei 7/1985, do 2 de abril, Reguladora do Réxime Local e 6 da Lei 5/1997, do 22 de xullo, Reguladora da Administración Local de Galicia, coa presente ordenanza, o Concello de Castrelo do Val, propón desenvolver a regulación da xestión da biomasa vexetal e das distancias de plantación de especies arbóreas e arbustivas, no solo urbano de núcleo rural e urbanizable delimitado, así como o deseño do procedemento administrativo de orde de execución de xestión de biomasa vexetal no ámbito das súas competencias, có obxecto de acadar as idóneas condicións de seguridade para reducir os riscos asociados ós incendios forestais, protexendo dos mesmos ás persoas, ás poboacións, ás infraestruturas e ós ecosistemas.

### **Artigo 1. Obxecto.**

O obxecto da presente Ordenanza é a regulación da xestión da biomasa vexetal no territorio municipal de Castrelo do Val e dentro do seu ámbito competencial, nos termos definidos na Lei 3/2007, de Prevención e Defensa contra Incendios Forestais de Galicia.

### **Artigo 2. Ámbito de aplicación.**

En consonancia có establecido no artigo 4.2 da Lei 5/1997, do 22 de xullo, Reguladora da Administración Local de Galicia, o disposto na presente Ordenanza aplicarase naqueles ámbitos que non estén explicitamente regulados na lexislación básica en materia de prevención e defensa contra incendios forestais.

Concretamente, será de aplicación en toda a superficie municipal situada no interior de núcleos de poboación (solo de núcleo rural, urbano e urbanizable delimitado), así como en aqueles terreos forestais ou de influencia forestal (situados a menos de 400 metros



de terreos forestais) que se atopen a menos de 50 metros de núcleos de poboación e de edificacións ou instalacións illadas, segundo establece o artigo 21 da Lei 3/2007, de Prevención e Defensa contra Incendios Forestais de Galicia.

### **Artigo 3. Definicións.**

**Solo urbano:** terreos que a planificación urbanística (PXOM) do concello e clasifica como tal en virtude do disposto na lexislación urbanística (vixente no momento de aprobación do PXOM: Lei 9/2002, de 30 de decembro, de Ordenación Urbanística e Protección do medio rural de Galicia).

**Núcleos rurais:** terreos que se inclúan dentro dos núcleos rurais delimitados na planificación urbanística municipal (PXOM), de conformidade có disposto na lexislación urbanística (vixente no momento de aprobación do PXOM: Lei 9/2002, de 30 de decembro, de Ordenación Urbanística e Protección do medio rural de Galicia).

**Solo urbanizable:** terreos que, non tendo a condición de núcleo rural nin de solo rústico, a planificación urbanística (PXOM) definiu e clasificou como tal ao obxecto de transformación urbanística nos termos fixados na lexislación urbanística (vixente no momento de aprobación do PXOM: Lei 9/2002, do 30 de decembro, de Ordenación Urbanística e Protección do medio rural de Galicia).

**Xestión da biomasa forestal:** eliminación parcial ou total da biomasa vexetal por medio do emprego das técnicas máis eficaces, con mínimo impacto ambiental (preferiblemente mecánicas) e coa intensidade e frecuencia precisas para xerar nivel de discontinuidades horizontais e verticais dos combustibles que garanten o cumprimento das condicións mínimas de seguridade e salubridade legalmente esixibles, así como a conservación dos valores naturais.

**Persoas responsables:** persoas titulares dos terreos, ou no seu caso usufructuarios do dereito de aproveitamento sobre os terreos, urbanos, urbanizables e de núcleo rural, así como as persoas, administración, entidades ou sociedades que poidan considerarse responsables ós efectos do establecido no artigo 21 da Lei 3/2007, de Prevención de Defensa contra Incendios Forestais de Galicia.

**Terreo Forestal:** terreo que cumpre con algún dos criterios especificados no artigo 2 da Lei 7/2012, do 28 de xuño, de Montes de Galicia.

**Zonas de influencia forestal:** áreas límites que abarcan unha franxa circundante dos terreos forestais cunha anchura de 400 metros, excluindo o solo urbano, de núcleo rural e o urbanizable.

**Especies pirófitas:** especies consideradas xeradoras ou potenciadoras dos riscos asociados ós incendios forestais e que están incluídas na disposición adicional terceira da Lei 3/2007, de Prevención e Defensa contra Incendios Forestais de Galicia (anexo I da presente Ordenanza).

**Especies frondosas:** especies arbóreas autóctonas incluídas no anexo I da Lei 7/2012, do 28 de xuño, de Montes de Galicia (anexo II da presente Ordenanza).

### **Artigo 4. Fundamentos legais.**



Descríbense brevemente a continuación as normas vixentes de maior relevancia en relación coa prevención de incendios forestais e coas distancias de plantación de árbores.

#### 4.1. Artigos 582, 591 e 592 do Código Civil.

Estabrecen as distancias mínimas que ten que existir entre árbores ou arbustos e as propiedades lindeiras, así como as condicións baixo as cales se poderá ordear ou executar a poda de ramas ou raíces que invadan unha propiedade lindeira.

#### 4.2. Decreto 2661/1967, do 19 de outubro, sobre distancias entre plantacións e fincas lindeiras.

Define as distancias mínimas que deberán respetas as novas repoboacións forestais con cultivos agrícolas límites, en función da especie forestal a plantar.

#### 4.3. Decreto 81/1989, do 11 de maio, sobre medidas de ordenación das novas plantacións có xénero Eucaliptus.

Complementa ao establecido no Decreto 2661/1967 con respecto ás distancias mínimas que deberán respetar as novas repoboacións forestais de eucaliptos con fincas lindeiras.

#### 4.4. Lei 43/2003, do 21 de novembro, de Montes.

Estabrece algunhas consideracións xerais sobre as responsabilidades das persoas e das administracións na prevención de incendios forestais, o réxime sancionador relacionado cós incendios forestais, entre outros aspectos.

#### 4.5. Lei 7/2012, do 28 de xuño, de Montes de Galicia.

Modifica gran parte do disposto na Lei 3/2007 e establece as distancias mínimas que hai que respetar polas novas repoboacións forestais.

#### 4.6. Decreto 105/2006, do 22 de xuño, polo que se regulan as medidas relativas á prevención de incendios forestais, á protección dos asentamentos e repoboacións forestais.

Estabrece por primeira vez na lexislación galega un conxunto de consideracións e limitacións normativas en relación coa prevención de incendios forestais.

#### 4.7. Lei 3/2007, do 9 de abril, de Prevención e Defensa contra Incendios Forestais de Galicia.

Define as redes secundarias de faixas de xestión de biomasa vexetal, as responsabilidades das persoas titulares de terreos no cumprimento da xestión da biomasa vexetal, así como as responsabilidades dos concellos na planificación da prevención de incendios forestais e na instrución dos procedementos precisos para facer efectiva a xestión da biomasa vexetal, entre outros aspectos.

#### 4.8. Orde do 18 de abril de 2007 pola que se zonifica o territorio con base no risco espacial de incendio forestal.



Determina os concellos que son considerados como zona de alto risco de incendio, no que o Concello de Castelo do Val inclúese como zona de alto risco de incendio.

4.9.Orde do 31 de xullo de 2007 pola que se establecen os criterios para a xestión da biomasa vexetal.

Estabrece as condicións mínimas legalmente esixibles coas que se debe xestionar a biomasa vexetal por parte das persoas responsables nas zonas definidas na Lei 3/2007.

4.10.Lei 39/2015, do 1 de outubro, de Procedemento Administrativo Común das Administracións Públicas.

Dispón as características que debe cumprir o procedemento aministrativo de orde de execución de xestión de biomasa vexetal.

4.11.Lei 2/2016, do 10 de febreiro, do solo de Galicia.

Define no artigo 135 os deberes das persoas titulares de terreos de mantelos nunhas condicións mínimas de seguridade, salubridade, accesibilidade universal e ornato público.

4.12.Decreto 143/2016, do 22 de setembro, polo que se aproba o Regulamento da Lei 2/2016, do 10 de febreiro, do solo de Galicia.

Complementa, no artigo 332, o disposto na Lei 2/2016, no que respecta ás responsabilidades dos titulares de terreos.

4.13.Lei 9/2017, do 26 de decembro, de medidas fiscais e administrativas.

Introduce modificacións á Lei 3/2007 no referente ás características das redes de faixas de xestión de biomasa vexetal e do procedemento para a xestión da biomasa vexetal.

4.14.Instrucción 1/2018, do 26 de abril, relativa ás actuacións administrativas en materia de cumprimento dos deberes de xestión da biomasa vexetal e retirada de especies arbóreas impostas pola Lei 3/2007, do 9 de abril, de Prevención e Defensa contra os Incendios Forestais de Galicia, a Lei 6/2011, do 13 de outubro, de Mobilidade de Terras e a Lei 7/2012, do 28 de xuño, de Montes de Galicia.

Desenvolve en profundidade, as características do procedemento de orde de execución de xestión da biomasa vexetal a instruír polo Concello e dos procedementos sancionadores asociados.

## **Artigo 5. Xestión da biomasa vexetal.**

5.1.Debere de xestión da biomasa vexetal no interior dos núcleos de poboación.

As persoas responsables, segundo o establecido no artigo 3 da presente Ordenanza, de terreos situados en solo urbano, urbanizable ou de núcleo rural, deberán de xestionar a biomasa vexetal das súas fincas antes do 30 de maio de cada ano.

5.2.Criterios de xestión da biomasa vexetal no interior dos núcleos de poboación.



A xestión da biomasa vexetal por parte das persoas responsables deberá executarse conforme aos seguintes criterios:

a) En solo urbano, urbanizable ou de núcleo rural, non poderán existir exemplares de especies pirófitas, de acordo coa definición establecida no artigo 3 desta Ordenanza, salvo que o correspondente informe técnico acredite que os exemplares posúen un especial valor natural ou ornamental ou que, por atoparse illados, non constitúen un risco significativo en relación coa propagación de incendios forestais.

b) No estrato arbóreo, as masas estarán formadas por especies non consideradas pirófitas, de acordo coa definición establecida no artigo 3 desta Ordenanza. Os exemplares deberán de estar distanciados entre si como mínimo 7 metros e deberán de estar debidamente podados no tercio inferior da súa altura ata un máximo de 4 metros, salvo que, polo debidamente xustificado valor natural ou ornamental dos mesmos, o correspondente informe técnico desaconselle a execución destas medidas.

c) Nos estratos herbáceo e arbustivo, realizaránse rozas para garantir o cumprimento do disposto no apartado b) de artigo 2 da Orde do 31 de xullo de 2007 pola que se establecen os criterios para a xestión da biomasa vexetal e en ningún caso estes estratos poderán superar a altura dun metro. As rozas serán realizadas ao completo e or medios mecánicos, salvo que o correspondente informe técnico, tras determinar a presenza de exemplares de especial valor natural ou ornamental, recomende a execución de rozas selectivas ou por medios manuais.

e) No caso de terreos nos que existan edificacións en estado ruinoso ou de abandono, realizaránse as actuacións de xestión de biomasa vexetal necesarias para garantir a accesibilidade á propiedade evitando en todo caso que a vexetación medre de xeito que comprometa a estabilidade estrutural da edificación.

f) Os criterios anteriores non serán de aplicación no caso de parques, xardíns ou espazos verdes de titularidade pública.

## **Artigo 6. Réxime de autorizacións para cortas de arborado no interior dos núcleos de poboación.**

6.1. A corta de calquera exemplar arbóreo en solo urbano, de núcleo rural requirirá da presentación no rexistro do Concello dunha comunicación previa (modelo de Anexo III) cunha antelación de 15 días á execución da corta.

6.2. A corta de calquera exemplar arbóreo que existira en solo urbanizable antes da entrada en vigor da Lei 7/2012 de Montes de Galicia requirirá da correspondente solicitude de autorización á Xunta de Galicia, segundo o establece a disposición transitoria quinta da devandita lei.

6.3. Naqueles casos nos que, conforme ao disposto no artigo 6 desta Ordenanza, sexa preceptiva a corta de exemplares arbóreos para o cumprimento das obrigas de xestión de biomasa vexetal, a persoa responsable non estará exenta do réxime de autorización establecido neste artigo.

## **Artigo 7. Biomasa vexetal residual.**



En cumprimento do establecido no artigo 95 da Lei 7/2012 de Montes de Galicia, trala realización das rozas ou cortas que resulten preceptivas en cumprimento das obrigas de xestión de biomasa vexetal deberá executarse adicionalmente unha trituración de restos in situ, agás no caso dos elementos leñosos de diámetro maior de 5 centímetros, que deberán ser retirados da parcela, salvo que o correspondente informe técnico prescriba expresamente o contrario.

### **Artigo 8. Afeccións a xestión da biomasa vexetal.**

1. Como norma xeral, no caso de que a execución de actuacións de xestión da biomasa vexetal estea condicionada por limitacións normativas establecidas por lexislacións sectoriais vixentes ou mesmo suxeita a un réxime de autorizacións, estas limitacións xunto coa necesidade de autorización deberán ser analizadas e incluídas no correspondente informe técnico.

2. Se, como conclusión do correspondente informe técnico, se desprende a necesidade de solicitar autorización a unha determinada Administración sectorial para executar a xestión da biomasa vexetal, a persoa responsable da dita execución, conforme co disposto no artigo 3 desta Ordenanza, será a única responsable de facer efectiva a dita solicitude.

### **Artigo 9. Tipos de afeccións á xestión da biomasa vexetal.**

A xestión da biomasa vexetal nos espazos que constitúen o ámbito desta Ordenanza poderá verse legalmente condicionada polos seguintes tipos de afeccións:

8.1. Recursos hídricos: sempre que a execución da xestión da biomasa vexetal afecte ou sexa realizada nas inmediacións de canles catalogadas pola Confederación Hidrográfica Miño-Sil ou a Confederación Hidrográfica do Douro, analizaráse a necesidade de solicitar autorización ao organismo de conca, o que deberá reflectirse no correspondente informe técnico. Como norma xeral, nas zonas de servidume dos cursos fluviais, nunha franxa de 5 metros dende o límite da canle, non se procederá a xestión da biomasa vexetal, salvo que así o autorice expresamente o organismo de conca. Nas zonas dos cursos fluviais, nunha franxa de 100 metros dende o límite da canle, aplicaránse na medida do posible métodos selectivos de control da vexetación, resultando preceptiva a solicitude de autorización ao organismo de conca no caso de que as actuacións de xestión de biomasa vexetal afecten significativamente a especies non consideradas pirófitas, de acordo co establecido no artigo 3 desta Ordenanza.

8.2. Conservación de hábitats e especies: en ningún caso se procederá á xestión da biomasa en hábitats identificados como prioritarios no anexo I da Directiva Hábitats (Directiva 92/43/CEE do Consello, do 21 de maio). O suposto de que o correspondente informe técnico ditamine que as actuacións de xestión de biomasa vexetal poden afectar directa ou indirectamente a especies de flora ou fauna protexidas, deberá solicitarse autorización á Administración competente en materia de conservación da natureza antes de executar as devanditas actuacións.



8.3. Procesos erosivos: en cumprimento da obriga establecida no artigo 44.2 d) da Lei 7/2012, de Montes de Galicia, en zonas elevadas pendentes, de solos fráxiles ou nas que existen evidencias de que se dan ou se poden dar procesos erosivos significativos, poderán proporse unha redución da intensidade da xestión da biomasa co fin de protexer os solos, se así o establece o correspondente informe técnico, que deberá contar co informe favorable da Administración forestal competente.

8.4. Patrimonio cultural: conforme ao disposto na Instrución de 8 de novembro de 2017 relativa ao trámite de autorizacións en materia de patrimonio cultural nos bens inmobles catalogados e declarados de interese cultural, os seus contornos de protección e as zonas de amortecemento, sempre que se realicen actuacións de xestión de biomasa vexetal nas inmediacións de bens catalogados do Patrimonio Cultural pedirase autorización á Administración autonómica competente, salvo que se trate de podas ou rozas por medios manuais ou mecanizados portátiles. Nos contornos de protección dos bens catalogados non será preciso solicitar autorización mentres as actuacións propostas non modifiquen significativamente a escena urbana ou a paisaxe natural na que se atopan.

#### **Artigo 10. Publicación de información.**

O Concello de Castrelo do Val publicará anualmente na súa páxina web unha cartografía das redes secundarias de faixas de xestión de biomasa vexetal, xunto cun listado onde se relacionen as referencias catastrais das parcelas afectadas polas franxas definidas no artigo 21 da Lei 3/2007.

#### **Artigo 11. Procedemento de orde de execución de xestión de biomasa vexetal.**

11.1. As persoas físicas ou xurídicas responsables, segundo o disposto no artigo 21.2 da Lei 3/2007, deberán executar a xestión da biomasa vexetal nos seus terreos de acordo co establecido na Orde do 31 de xullo de 2007 pola que se establecen os criterios de xestión da biomasa vexetal ou, no seu caso, no artigo 6 desta Ordenanza antes do 30 de maio de cada ano.

11.2. Unha vez transcorrida esta data sen que os responsables executaran as actuacións pertinentes de xestión de biomasa vexetal, o Concello poderá dar inicio á instrución do procedemento de orde de execución de xestión de biomasa vexetal.

#### **Artigo 12. Inicio do procedemento de orde de execución de xestión de biomasa vexetal.**

12.1. Unha vez transcorrido o 30 de maio de cada ano, os servizos técnicos municipais, así como calquera cidadán, poderán poner en coñecemento a posible situación de incumprimento das obrigas de xestión de biomasa vexetal mediante a presentación no rexistro do Concello da correspondente instancia na que deberá identificarse unha única parcela obxecto do procedemento mediante polígono e parcela catastrais.

12.2. Unha vez presentada a instancia, o órgano instructor emitirá unha providencia na que será solicitado un informe técnico de información previa, no que se determinará a necesidade de ordenar a execución de actuacións de xestión de biomasa vexetal, conforme coa lexislación vixente.



12.3. Se as conclusións do informe técnico ditaminan que a parcela obxecto do procedemento incumpre efectivamente as obrigas de xestión de biomasa vexetal, o órgano instructor procederán á incoación do procedemento de orde de execución de xestión de biomasa vexetal.

### **Artigo 13. Resolución do procedemento de orde de execución de xestión de biomasa vexetal.**

13.1. Trala incoación do expediente e a emisión do informe de secretaría, procederase á emisión da proposta de orde de execución, que será comunicada á persoa responsable, outorgándolle un período de 10 días para presentar as alegacións, documentos ou xustificacións que estime pertinentes.

13.2. Unha vez transcorrido o dito prazo sen que a persoa titular presente alegación ningunha (tal e como debe acreditar o certificado de secretaría), procederáse á emisión da orde de execución, que deberá ser notificada de xeito íntegro nun prazo inferior a 10 días á data de emisión, conforme co establecido no artigo 40.2 da Lei 39/2015, do 1 de outubro, de procedemento administrativo común das administracións públicas.

### **Artigo 14. Execución das actuacións.**

14.1. O prazo xeral para a execución das actuacións de xestión de biomasa vexetal é, segundo o establece o artigo 22.3 da Lei 3/2007, de 15 días naturais, contado dende o día seguinte á data de recepción da notificación por parte da persoa titular.

14.2. Unha vez transcorrido ese prazo, os servizos técnicos municipais poderán visitar a parcela obxecto do procedemento e, mediante a redacción do correspondente informe técnico de execución, constatar o cumprimento ou incumprimento da execución ordenada.

14.3. Se o devandito informe técnico conclúe que as actuacións ordenadas foron executadas nos termos esixidos na orde de execución, poderá procederse ao arquivo do expediente de orde de execución de xestión de biomasa vexetal.

### **Artigo 15. Incumprimento das obrigas.**

15.1. Se o informe técnico de execución ditamina que as actuacións de xestión de biomasa vexetal foron executadas só parcialmente ou incumprindo parte do resolto na orde de execución, procederáse á emisión dunha nova orde de execución, nos termos establecidos no artigo 12.2 desta Ordenanza, na que se detallarán as actuacións necesarias para o total cumprimento das obrigas de xestión de biomasa vexetal outorgando un novo prazo para a súa execución.

15.2. No caso de que o informe técnico de execución conclúa que as actuacións ordenadas non foron executadas, nin total nin parcialmente, actuaráse do modo seguinte:

a) Procederáse á liquidación provisional dos custos da execución subsidiaria repercutindo na persoa responsable.

b) Ordenarase á execución subsidiaria das actuacións.





c) Porase en coñecemento do correspondente servizo da xefatura territorial da Xunta de Galicia o incumprimento das obrigas de xestión de biomasa vexetal, para os efectos de que poida iniciarse o correspondente procedemento sancionador.

#### **Artigo 16. Notificación infructuosa.**

16.1. De acordo co artigo 44 da Lei 39/2015, de 1 de outubro, de procedemento administrativo común das administracións públicas, no caso de que a persoa responsable sexa descoñecida, non posúa domicilio de notificación coñecido, ou a notificación a ésta non se poida facer efectiva, o Concello levará a cabo a notificación mediante a súa publicación no Boletín Oficial do Estado e no Diario Oficial de Galicia.

16.2. No caso anterior, o cómputo do prazo para a execución das actuacións iniciarásese dende o día seguinte ao da data de publicación da notificación no Boletín Oficial do Estado.

#### **Artigo 17. Execución subsidiaria.**

17.1. Para a liquidación provisional dos custos da execución subsidiaria empregaranse os prezos das tarifas Seaga vixentes en cada anualidade correspondentes ás actuacións de xestión de biomasa vexetal ordenadas.

17.2. O Concello poderá optar entre a contratación do servizo de execución subsidiaria e a execución con medios municipais. Neste último caso, os custos para liquidar finalmente serán estimados polos servizos técnicos municipais.

17.3. Trala execución subsidiaria das actuacións de xestión de biomasa vexetal procederase á liquidación final, co correspondente cobramento ou devolución do saldo acreedor ou debedor resultante.

17.4. No caso de non ser posible a liquidación provisional ou final dos custos da execución subsidiaria, por ser a persoa responsable descoñecida, comunicarásese este feito ao correspondente servizo da xefatura territorial da Xunta de Galicia, podendo dar comezo a un procedemento de expropiación forzosa da parcela obxecto do expediente, en caso de exceder o importe para liquidar o valor catastral desta.

#### **Artigo 18. Informes técnicos de xestión de biomasa vexetal.**

18.1. Os informes técnicos, tanto de información previa como de execución, que formen parte do procedemento de orde de execución de xestión de biomasa vexetal deberán ter o seguinte contido mínimo:

- a) Identificación da parcela mediante referencia catastral e plano de situación.
- b) Descrición xeral da parcela. Tipos de afección (rede secundaria, núcleo urbano, etc.) e plano de superficies afectadas. Accesos e límites.
- c) Análise da composición específica e da estrutura (alturas e densidades) dos estratos herbáceo/arbustivo e arbóreo existentes na parcela.
- d) Fotografías que amosen visualmente o estado da vexetación descrita.



e) Caracterización dos combustibles en termos de risco e comportamento do lume asociado baixo escenarios meteorolóxicos desfavorables.

f) Análise de posibles afeccións á xestión da biomasa vexetal.

g) Propostas de actuación.

h) Conclusións.

### **Artigo 19. Repoboacións forestais.**

19.1. De acordo co establecido no artigo 67 da Lei 7/2012, do 28 de xuño, de Montes de Galicia, non está permitido executar novas repoboacións forestais en solo urbano, de núcleo rural ou urbanizable.

19.2. As repoboacións forestais preexistentes á entrada en vigor da devandita Lei 7/2012 que estén situadas en solo urbano, de núcleo rural ou urbanizable deberán ser adaptadas ao establecido no anexo II da Lei 7/2012, mantendo como norma xeral unha distancia mínima de 30 metros (15 metros no caso de frondosas incluídas no anexo II desta Ordenanza) con edificacións, vivendas illadas, depósitos de lixo, parques e instalacións industriais ou 50 metros (25 no caso de frondosas incluídas no anexo II desta Ordenanza) con gasolineras e outras instalacións nas que se desenvolvan actividades cualificables de perigosas, segundo a Lei 1/1995, do 2 de xaneiro, de protección ambiental de Galicia.

### **Artigo 20. Especies prohibidas.**

Non está permitida a plantación de exemplares de especies arbóreas pirófitas, de acordo coa definición establecida no artigo 3 desta Ordenanza (especies incluídas no anexo I) en solo urbano, de núcleo rural ou urbanizable delimitado.

### **Artigo 21. Distancias de plantacións de árbores.**

21.1. A plantación de calquera exemplar arbóreo, de especies non incluídas no anexo I desta Ordenanza, en solo urbano, de núcleo rural ou urbanizable deberá cumprir coas seguintes distancias de seguridade:

a. 2 metros cós marcos das parcelas lindeiras.

b. 4 metros co dominio público de vías de comunicación.

c. 5 metros con canles fluviais de máis de 2 m de anchura.

d. 5 metros con liñas de tendido eléctrico (medindo ata a proxección horizontal do elemento condutor incluíndo a súa desviación máxima co vento, segundo á normativa aplicable a cada caso).

e. 25 metros co límite exterior de gasolineras e outras instalacións nas que se desenvolvan actividades cualificables de perigosas, segundo a Lei 1/1995, do 2 de xaneiro, de protección ambiental de Galicia.

21.2. As distancias mediránse en horizontal dende o tronco da árbore.



## **Artigo 22. Infraccións.**

22.1.O incumprimento das obrigas de xestión de biomasa vexetal establecidas tanto nesta Ordenanza como na Lei 3/2007, do 9 de abril, de Prevención e Defensa contra Incendios Forestais de Galicia, constitúe unha infracción, de acordo co establecido no artigo 50.2 da devandita lei.

22.2.O incumprimento das prescricións establecidas no artigo 5 desta Ordenanza constitúe unha infracción, de acordo co establecido no artigo 128 da Lei 7/2012, de Montes de Galicia.

22.3.O incumprimento da obriga establecida no artigo 3 desta Ordenanza, concernente ao réxime de autorizacións nas cortas de arborado constitúe unha infracción.

## **Artigo 23. Cualificación das infraccións por incumprimento das obrigas de xestión de biomasa vexetal.**

23.1.Posúen a cualificación de infracción leve:

a.A definida no artigo 23.1 desta Ordenanza, derivada do incumprimento das obrigas de xestión de biomasa vexetal, segundo o establece o artigo 51 da Lei 3/2007.

23.2.Posúen a cualificación de infracción grave:

a.A infracción definida no artigo 23.2 desta Ordenanza, derivada do incumprimento das prescricións sobre plantación de árbores en núcleos poboacionais, de acordo co establecido no artigo 129 da Lei 7/2012, de Montes de Galicia.

b.A definida no artigo 23.3 desta Ordenanza, derivada do incumprimento do réxime d autorizacións en materia de cortas de arborado.

23.3.A comisión de tres infraccións leves no prazo de dous anos, constitúe, así mesmo, unha infracción grave.

## **Artigo 24. Contías das sancións por incumprimento das obrigas de xestión de biomasa vexetal.**

24.1.As contías definidas para as sancións pola comisión de infraccións leves, segundo o establece o artigo 74 da Lei 43/2003, do 21 de novembro, de montes, son de 100,00 a 1.000,00 euros.

24.2.As contías definidas para as sancións pola comisión de infraccións graves, segundo o establece o artigo 74 da Lei 43/2003, do 21 de novembro, de montes, son de 1.1001,00 a 100.000,00.

24.3.Cando para a protección dos distintos aspectos considerados nesta Ordenanza concorran outras normas de rango superior, as infraccións sancionaránse coforme ás maiores contías e severas medidas establecidas.

## **Artigo 25. Gradación das sancións.**



25.1. En cada expediente sancionador a contía da multa poderá ser graduada, atendendo aos criterios establecidos nos artigos 52 da Lei 3/2007 e 132 da Lei 7/2012, de Montes de Galicia.

25.2. Adicionalmente aos criterios citados no punto anterior, no caso de incumprimento da xestión da biomasa vexetal en solo urbano, de núcleo rural, ou urbanizable, teránse en conta os seguintes criterios complementarios:

a) O índice de prioridade de actuación, definido no Plan de Prevención e Defensa contra Incendios Forestais Municipal, que esté asignado á parcela obxecto do procedemento.

b) A presenza na parcela obxecto do procedemento de especies arbóreas pirófitas.

c) A presenza na parcela obxecto do procedemento de edificacións en estado ruinoso ou de abandono.

25.3. No caso de incumprimento das prescricións sobre plantación de árbores en solo urbano, de núcleo rural, ou urbanizable delimitado, teránse en conta os seguintes criterios complementarios:

a) Se os exemplares plantados son especies pirófitas, de acordo coa definición establecida no artigo 3 desta Ordenanza.

b) Se o incumprimento concirne ás distancias mínimas con gasoleiras ou outras instalacións nas que se desenvolvan actividades cualificables de perigosas segundo a Lei 1/1995, do 2 de xaneiro, de Protección Ambiental de Galicia.

25.4. No caso de incumprimento do réxime de autorizacións en materia de cortas de arborado en solo urbano, de núcleo rural, ou urbanizable delimitado, terase en conta o seguinte criterio complementario:

a) Se os exemplares cortados pertencen a especies de frondosas.

## **Artigo 26. Multas coercitivas.**

26.1. A comisión de infraccións por incumprimento da xestión de biomasa vexetal e por incumprimento das prescricións sobre plantación de árbores poderá dar lugar á imposición de multas coercitivas.

26.2. As multas coercitivas serán reiteradas por periodos dun mes, sendo a contía de cada multa do 20,00% da sanción total fixada para a infracción cometida.

26.3. Para a exacción das sancións, en defecto de pago voluntario ou acatamento da sanción imposta, seguiráse o procedemento administrativo de constrinximento.

## **Artigo 27. Competencia sancionadora.**

27.1. A competencia para iniciar e instruír o procedemento sancionador por incumprimento das obrigas de xestión de biomasa vexetal nas redes secundarias de faixas, de acordo co establecido no punto quinto da Instrución 1/2018, do 26 de abril, relativa ás actuacións administrativas en materia de cumprimento das obrigas de xestión da biomasa vexetal (...), pertence unicamente á Xunta de Galicia.



27.2.A competencia para iniciar e instruír o procedemento sancionador or infraccións no interior dos núcleos de poboación, de acordo co artigo 54 da Lei 3/2007, do 9 de abril de Prevención e Defensa contra Incendios Forestais de Galicia, pertence á Administración Local.

27.3.No suposto do parágrafo anterior, a competencia par resolver os procedementos sancionadores polas comisións de infraccións leves e graves pertence á persoa titular da Alcaldía, mentres que no caso da comisión de infraccións moi graves pertencerá ao Pleno municipal.

### **Disposición transitoria.**

As repoboacións forestais preexistentes á entrada en vigor desta Ordenanza que, como consecuencia da súa aplicación, atopáranse a unha distancia menor a regulada no artigo 20, disporán dun período máximo de dous anos para adaptarse á citada disposición, agás autorización expresa do órgano competente da Xunta de Galicia en materia forestal.

### **Disposición derogatoria.**

Quedan derogadas as disposicións municipais que contraveñan o disposto nesta Ordenanza.

### **Disposición derradeira.**

Esta Ordenanza entrará en vigor no día da súa publicación no Boletín Oficial da Provincia de Ourense.

## **Anexo I: Especies pirófitas**

### **Nome científico – Nome común**

**Pinus pinaster** – Piñeiro galego, Piñeiro do país. **Pinus sylvestris** –Piñeiro silvestre. **Pinus raidata** – Piñeiro de Monterrey. **Pseudotsuga menziesii** – Piñeiro de Oregón. **Acacia dealbata** – Mimosa. **Acacia melanoxylon** – Acacia negra. **Eucalyptus spp** – Eucalipto. **Calluna vulgaris** – Queiruga. **Chamaespartum tridentatum** – Carqueixa. **Cytisus spp** – Xesta. **Erica spp** – Uz, carpaza. **Genista spp** – Xesta; piorno. **Pteridium aquilinum** – Fento común. **Rubus spp** – Silva. **Ulex europaeus** – Toxo.

### **Anexo II. Especies frondosas**

### **Nome científico – Nome común**

**Pinus silvestris** – Piñeiro silvestre. **Taxus baccata** – teixo. **Alnus glutinosa** – Ameneiro. **Acer pseudoplatanus** – Pradairo. **Betula sp** – Bidueiro. **Fraxinus excelsior** – Freiso. **Fraxinus angustifolia** – Frelia. **Castanea sativa** – Castiñeiro. **Castanea x hibrida** – Castiñeiro híbrido. **Prunus avium** – Cerdeira. **Quercus robur** – Carballo. **Quercus pirenaica** – Cerquiño. **Quercus suber** – Sobreira. **Quercus petraea** – Carballo albar. **Quercus ilex spp.** **Ballota** – Aciñeira. **Quercus rotundifolia** – Aciñeira. **Coryllus avellana** – Abeleira. **Fagus sylvatica** – Faia. **Ulmus glabra**, **Ulmus minor** –



Umeiro. **Laurus nobilis** – Loureiro. **Sorbus aria** – Sorbeira do mente. **Sorbus aucuparia** – Capudre. **Juglans regia** – Noqueira. **Arbutus unedo** – Érbedo.